

小畜卦第九（下乾天 上巽風 — 風天小畜）



小畜，亨；密雲不雨，自我西郊。

1. 陽大陰小。小，象徵陰，亦為程度不大之意。畜，音序，有畜聚、畜止、畜養之意。小畜卦下乾天、上巽風，卦爻中一陰以畜五陽，故為以小畜大，所畜者微小之意。然物能以小畜大，以下濟上，以柔益剛，故行可亨通。
2. 程頤曰：畜，止也，止則聚矣。小字，象徵陰，又指程度大小。卦中六四一陰居五陽之間，正是小者畜大，所畜甚微之象，故稱小畜。
3. 李士鈞曰：小畜，臣畜君也。孟子曰，畜君何尤？畜君者，好君也，臣能畜君，君能從臣，所以亨也。
4. 濃雲密佈卻不降甘霖，此雲氣之升起，是來自西方我文王岐周之地，猶如我文王臣事紂君，畜君無力，致君德未成，德澤未能施加於天下，深感慚愧。
5. 朱熹曰：西郊，陰方。我者，文王自我也。文王演易於羑里，視岐周為西方，正小畜之時也。
6. 程頤曰：雲，陰陽之氣，二氣交而和，則相畜固而成雨。陽倡而陰和，順也，故和；若陰先陽倡，則不順，故不和，不和則不成雨。東、北陽方，西、南陰方。雲之畜聚雖密而不成雨者，自西郊陰先陽倡故也。畜陽者四，畜之主也，據四而言，故云自我。以人觀之，雲氣之興，皆自四遠，故云郊。
7. 李士鈞曰：文王臣順事紂，君之陽德未成，澤不被於天下，文王不忍斥紂，且以事君未成，引以為過，以為陽德未成，陰之過也；君德未成，臣之咎也，徒深望雨之思，恨無回天之力。曰密雲不雨，望君者切矣，所謂王庶幾改之，予日望之也。曰自我西郊，自責者深矣，所謂臣罪當誅，天王聖明也。
8. 序卦傳：比必有所畜，故受之以小畜。

彖曰：小畜，柔得位而上下應之，曰小畜。健而巽，剛中而志行，乃亨。
密雲不雨，尙往也。自我西郊，施未行也。

1. 彖傳曰：小畜卦之六四爻，陰柔得位，有應於上下諸陽，然以陰畜陽，又以

一陰而畜五陽，以小畜大，能繫而不能固，是以稱為小畜。而其卦象內乾健、外巽順，謂能強健而遜順。又九二、九五爻陽剛居中，其志得以遂行，故得亨通。

2. 程頤曰：以陰居四，又處上位，柔得位也。上下五陽皆應之，為所畜也。以一陰而畜五陽，能係而不能固，是以為小畜也。
3. 馬其昶曰：大畜、小畜皆畜乾也。陽大陰小，故艮陽畜乾為大畜，巽陰畜乾為小畜，小畜一陰力寡，非孚五不能及天下，故曰剛中而志行乃亨。乃者，難詞也。（才也。）
4. 卦辭所謂濃雲密佈卻不降甘霖者，乃因陽氣仍在上蒸，陰氣畜陽不足也，即君德未成，臣之咎也。所謂雲氣之升起，是來自我西邑郊外之地者，乃說明陰陽交和之功，尚未能施行。即甘霖未降，德澤未施也。
5. 程頤曰：陽尚往而上，而自我陰方之氣先倡，故二氣不和不能成雨，而其功施未行也，小畜不能成大，猶西方之雲，不能成雨也。

象曰：風行天上，小畜；君子以懿文德。

1. 大象傳曰：小畜卦下乾天、上巽風，有風行天上之象。風飄行於天上，則陰氣畜聚於天上而未下行，故稱為小畜。
2. 九家易曰：風者，天之命令也。今風行天上，則是令未下行，畜而未下，則是小畜之義也。
3. 君子者觀察小畜卦，風行天上，令未下行，德澤未施於天下之象，悟知當及時修美文德，待時而發。◎懿，音益，美好也，此當動詞，修美之義。
4. 劉沅曰：懿，美也。道著躬行曰大德，道著儀文曰小德，曰文而必曰德者，見文乃德之華也。
5. 馬振彪曰：文德美在其中，暢四支為小德；發事業為大德。德配天地，故經天緯地曰文。
6. 馬振彪又曰：孔子繫易曰以懿文德，蓋深見文王之能成畜道，以小畜大，以臣畜君，無往不亨，其德為至純至美矣。

初九，復自道，何其咎，吉。

象曰：復自道，其義吉也。

1. 初九陽剛得正，上應六四，為陽剛有為之才，當小畜之時，有被畜而志不能伸之象，惟其能及時覺悟，復返於陽剛之道。且能面對困難，知過而改，承受疑謗之咎，義不返顧，而終獲吉祥。 ◎何，通「荷」，承受、負荷之意。
2. 王夫之曰：乾健受畜，施不能行，非乾志也。初與四應，而受其畜，咎將歸之，然位在潛藏，則來復以養其微陽，固其道也。義正則咎有所不辭，君子秉義不回，以受天下之疑謗，其究也，吉必歸之。
3. 馬其昶曰：彖言密雲不雨，自我西郊，亦所謂何其咎也。
4. 董仲舒曰：魯桓忘其憂而禍逮其身，齊桓憂其憂而立功名，推而散之，凡人有憂而不知憂者凶，有憂而深憂之者吉。易曰，復自道，何其咎，此之謂也。
5. 象傳曰：初九能及時覺悟而復返於陽剛之道，乃因其所行不悖於理，故可獲吉祥。 ◎義，宜也，即不悖理。
6. 張浚曰：能返身以歸道，其行己必不悖於理，是能自畜者也，故曰其義吉也。

九二，牽復，吉。

象曰：牽復在中，亦不自失也。

1. 九二陽剛得中，上無應與，其以剛中之質，能與初九相牽連而復返於陽剛之道，故可獲吉祥。
2. 初、陽剛得正，二、陽剛得中，當小畜之時，未為陰所畜，能復返於陽剛之道而獲吉祥。可知，初、二兩爻之所以為吉者，以其居位中正也。
3. 王申子曰：初為陰所蓄，亦既復矣。二居下得中，上又無應，故不待畜，即與同類牽連而復，是不自失其中者也。
4. 象傳曰：九二能與初九相牽連而復返於陽剛之道，在於其居位中正，亦能不自失其陽剛之德。

5. 楊萬里曰：初安於復，故爲自復；二勉於復，故曰牽復，能勉於復，故亦許其不自失。

九三，輿說輻，夫妻反目。

象曰：夫妻反目，不能正室也

1. 九三居位不中，剛亢躁動，比近六四，而為其所畜，有輿與輻、夫與妻之關係。惟六四乘於九三之上，九三受制，終致有輿脫輻、夫妻反目之象。雖無兆辭，惟難免其凶。 ◎輿說輻，謂輪輻脫損，車不能行也。輿，車駕也。說，同「脫」。輻，車輪中之直木。 ◎反目，不相對視也，謂夫妻離異也。
2. 李士鈺曰：三、四陰陽比合，有夫妻象。下卦乾爲夫，上卦巽長女爲妻，亦夫妻象，妻當在內、在下，夫當在外、在上，今夫在內而妻在外，妻又乘夫，反目之道。
3. 馬其昶曰：輻，或作輹，輿脫輹，制之使不行也。巽婦乘乾夫，又三、四互火澤睽，故有夫妻反目之象。
4. 象傳曰：九三雖比近六四，卻不相和合，有夫妻反目之象者，乃因九三雖陽剛而不能自覺，乃受制於陰柔六四，猶如丈夫不能規正其妻室。
5. 馬其昶曰：初之畜以應四，二之畜以在中，三之畜以迫近於陰，爲其所制。曰不能正室者，罪三之不自斂而受制於陰也。 又曰：易例，凡兩爻切比，柔乘剛皆不利。若異體相應，距離遠，柔在上則無所嫌。

六四，有孚，血去惕出，無咎。

象曰：有孚惕出，上合志也。

1. 六四陰柔得位，為小畜卦主，稟性柔正，心孚誠信，上承九五，畜陽有道，九五亦剛中有信，安受其畜，兩相有得，眾陽亦皆從之，故可免去血傷惕懼之憂，而無咎害。 ◎血去惕出，謂傷之者去而戒懼之念消。
2. 李士鈺曰：自二至上，互成中孚，巽兌皆有孚象。陰之力不足以畜陽，惟其有孚於五，君臣相信，畜道乃成。故孔子曰，信而後諫，未信則以爲謗己也。

陰傷於陽則有血，孚於陽則傷之者去矣，故血去。陰懼陽侵則惕，孚於陽則戒懼之念消矣，故惕出。

3. 項安世曰：六四以陰畜陽，以小包大，能無憂乎？獨恃與五有孚，故能離其血惕，去而出之，以免於咎。臣之畜君，必信而後濟，非與上合志，不可為也。
4. 郭雍曰：以人畜天，以柔畜剛，非天下之至誠，其孰能與於此？
5. 象傳曰：六四獨恃其與九五誠信相孚，故能免除受傷與憂懼之害者，說明其與陽剛尊上之九五意志相合。

6. 程頤曰：六四處近君之位，畜君者也。若內有孚誠，則五從其畜，五既合志，則眾陽皆從之矣。

九五，有孚攣如，富以其鄰。

象曰：有孚攣如，不獨富也。

1. 六四心孚誠信，上承九五，九五亦以誠信之德，牽繫下三陽以共信六四，而成陰柔得正而上下相應之小畜盛況。且其又以陽剛之質，增富其相比鄰之六四。 ◎攣，牽繫、牽連也。 ◎富，陽稱富，謂以陽剛增富之。 ◎

以，與也。 ◎鄰，相比為鄰，此指九五、六四君臣同體故稱鄰。

2. 尚秉和曰：四卦主，孚謂孚於四也，陽喜陰，故下三陽亦孚於四，有若牽引連接也。
3. 馬其昶曰：五居四上，其氣上往而不下交，爻勉其孚四，四、五孚而畜道成矣。無吉占者，想望之辭，非五所能也。
4. 象傳曰：九五以誠信之德，牽繫下三陽以共信六四一陰者，乃意指其不獨享陽剛富貴。
5. 李士鈔曰：九五富不獨富，能併六四而富之，蓋陰陽交孚，君臣一德，天位與共，天祿與食，所謂富以其鄰也。
6. 馬振彪曰：孔子稱周之德為至德。四以臣位有孚之德，乃能成五之有孚。若堯舜之於臣鄰，以天下讓，是不獨富矣。

上九，既雨既處，尚德載；婦貞厲，月幾望；君子征凶。

象曰：既雨既處，德積載也。君子征凶，有所疑也。

1. 上九居小畜卦終，終極則反，其陽剛之德，盡為六四所畜止，陰陽相合，積載滿盈，則密雲不雨已化而成雨。然小畜之道當密雲不雨，不宜既雨，譬諸人事，則如婦人之謹守正道，以防危厲，其道如月之將圓，而不使之過盈，日盈則昃，即在戒陰之不可盛滿。而君子則不用小畜之道以求發展，否則陽德盡為陰氣所積載，將遭致凶災。 ◎處，止也。 ◎尚德，指上九之陽德。

◎載，謂積載滿盈。

2. 程頤曰：上九以巽順之極，居卦之上，處畜之終，從畜而止者也，為四所止也。既雨，和也。既處，止也。陰之畜陽，不和則不能止；既和而止，畜之道成矣。四用柔巽之德，積滿而至於成也。陰柔之畜剛，非一朝一夕能成，乃由積累而至，可不戒乎？
3. 吳澄曰：月幾望者，陰之盛也。 歸有光曰：月幾望者，危之也。
4. 劉沅曰：陰德正盛之時，既戒陰之尚德，又戒陽之妄動。
5. 象傳曰：密雲不雨已化而成雨，上九陽德已盡為六四所畜止者，乃說明二者陰陽相合，陽剛之德已積載滿盈。而君子沿小畜之道尋求發展，將遭致凶災者，則說明小畜之以陰畜陽，而須戒其終極而反，而反至於陰而疑陽而戰。
6. 王弼曰：婦制其夫，臣制其君，陰疑於陽，必見戰伐之義，乃認為小畜至極必反。
5. 馬振彪曰：孔子繫易曰以懿文德，蓋深見文王之能成畜道，以小畜大，以臣畜君，無往不亨，其德為至純至美矣。